



## Орган Лемковского Союза.

Выходит в каждый четверг.

Редакция и администрация в Крыници. — Адрес „Лемко” Крыница.

Всіх читателів, котры не вплатили ище пренумераты, просиме выровнати якнайскорше рахунки.

## Теория профессора Рорбаха.

Дня 2. квітня 1936. в Берлині в „домі німецькой пресы” отбыло ся численне собрание „Союза украинців” живучих в Германии по случаю пятнадцатилітнього иствования того союза основаного в р. 1921. На собранию участвовал также делегат „галицької України” в лиці одного дыректора украинского Центросоюза со Львова.

Президия собрания достала много привітственных телеграм от гитлеровских руководителей, а головном точком программы был отчит (лекция) проголошенный профессором университета німцом Рорбахом о теперешном положению украинской проблемы.

Професор тот уходит медже німцами за знатока украинской проблемы и его погляды на украинский вопрос уж давно были знаны в Германии яко так звана „теория Рорбаха”. От многих літ поширял он в Німеччині теорию, што Німеччина должна сотворити Украину за всяку ціну. В выголошенем тепер рефераті професор зазначил, што теория и идея его совсем не стратила на вартости и важности для Германии и што Німеччина не должна и не може отказати ся от стремлений злучити всі части „украинских” земель под своим патронатом. Вправді брест-литовский мир, сказал профессор, был заключеный німцами против засадам и интересам німецько-украинской политики, але был он ошибком німецьких дыпломатов, котру должна направити теперешна Германия.

Инши ораторы выповідали также барз великы надіи на соєдыненє „украинских” земель в одну „украинску” державу, прирекаючи собі, што така держава заняла бы перше місце медже иншими державами восточной Европы.

Польскы газеты, доносячи о том, удивляють ся, што Берлин и німцы так живо интересуют ся украинскими справами, але потішають ся наразі тым, што названный укра-

инский конгрес не выказал ворожого настроєня в виду Польщи. Крім того с голосов польской пресы видно, што она вздержує ся писати о той справі всьо того, што само собом насуват ся на гадку и што живо противит ся интересам и цілости польской державы.

Прямо гварячи, преса польска ввиду союзу, який тепер часово лучит Польшу с Німеччином не хоче публично порушати той проблемы, што зберанє (злученє) „украинских” земель под патронатом и проводом Германии єст немислиме без грубого нарушєня, взглядно оторваня от Польщи значного обшару земель населеного руским населєм.

Трудно собі в дійстности представити, штобы таке злученє „украинских” земель могло обняти лем землі населены малоросами с теперешного состава Совітского Союза и приміром обшар Прикарпатской Руси входячей в состав Чехословацкой Республики, (котру в Берлині на конгресі названо уж „карпатском Украинном”) с поминєнем Поліся, Волини, Подоля и восточной Галичины, бо таке злученє противит ся засадам здравого розума и єст неосягаєме.

Промолчанє той справы польском пресом хочбы со взглядов недражненя німецькой публичной опинии пригадує нам сказочне поведєнє струся, котрый ховат голову в пісок, думаючи, што ся сховал уж цілый и што уйде опасности.

Відома річ, што пляны и посягательства передвоенной царской Росии в часах найвеце експанзивного стремленя не сягали николи поза Карпаты и Сян, подчас коли украинский политичный сепаратизм, ведєный на мотузку противославянской німецькой политики, сягат от „зеленого клина” поза Карпаты до берегов Тисы.

И хоч часово Берлин не организует отверто дыверзийных банд украинских терро-

ристов, хоч не финансирует публично тихой домовою войны в границах нашей державы и хоч на згаданом украинском конгресі в Берлині не выступали официально днешны руководителі гитлеровской Німеччины, то всеже пляны німецькой политики и способы ей реализации остали ся тоты самы.

Одного однак там не бракло, а то делегата и репрезентанта „галицькой України” дыректора украинского Центросоюза, котрый хоч молчаливо, но самым своим присутствием засвідчил тиху солидарность того Пиемонта украинского сепаратизма с теорией профессора Рорбаха о собранию „украинских” земель.

А тото для польской пресы и польской общественности особенно тепер в часі трєваня так званой польско-украинской згоды повинно быти наилучшим мірилом моральной вартости галицького украинского сепаратизма.

Одны делегаты ідут до Варшавы и в Сеймі співають на нуту льяольности ввиду Польщи, а другы ідут „нишком-тишком” в Берлин, штобы не стратити контакта (связи) с „полковником” Конвальцом.

Мы на том визнаєме ся добре, бо мы их знаєме от их „зачатя”, не знає ся однак на том на жаль Варшава.

## Оконченє курсов выправы овечих скор в Мушині и в Жегестові.

Дня 2-го квітня отбыло ся в Мушині красне торжество окончєня курсов выправы овечих скор, які отбыли ся в часі от 10-го лютого до 2-го квітня т. р. в Жегестові и в Мушині.

Курсы тоты окончило в Жегестові 14-ох участников, походячих с Жегестова, Андрєвки и Верхмлі Великой, — в Мушині 20-ох участников с Мушины, Дубного, Войковы, Лєлюхова, Щавника, Тылича, Злоцкого и двох с Ганчовы горлицького повіта.

На окончєнє курсов приїхал Предсідатель О. Т. Р. Нарцыз Поточек, посол Бодзьоны,

Пренумерата в краю:  
30 грошей місячно,  
80 „ квартално  
1.50 „ полрочно,  
3 зл. рочно.  
В Америкі: 1 дол. рочно.  
В Чехословакии:  
2 кор. місячно, 10 кор. полрочно,  
20 кор. рочно.  
Ціны оголошень:  
Ціла сторона 120 зл., 1/2 стороны 60 зл., 1/4 стороны 35 зл., 1/8 стор. 20 зл., 1/16 стор. 10 зл.;  
оголошеня малы за 1 мм. 20 гр.,  
в тексті 30 гр., перед текстом 40 гр. При місячном и долшом оголошеню значна знижка.  
Контото чекове Нр. 404.155.



инспектор Издебский, делегат Палаты Рольной инж. Грущинский, войт Мушины Ал. Милянч, секретар Лемко-Союз: М. Трохановский, управитель О.Т.Р. в Н. Санчі Климчак и много людей с доокрестных сел.

Прибывшим представил ся милый вид добре выправленых овечих скор, — результат труда участников курса. Были там скоры выправлены двояко, а именно: 1) заправом хлібовом и 2) дубовом. Зроблено того в той ціли, штобы выказати курсантам, же хочачи мати добрый кожух, не треба щадити час и роботу, але выправяти скоры заправом дубовом, котра дає скоры мягкы, гладкы и непринимаючи воды.

Гостей встрітила также друга, барз приятна нежданность. Экзаменованы курсанты давали так точны отвіты, говорили о выправі скор с таким знакомством предмета, же дают они полне ручательство, же наука не пошла надармо и же они потрафят самостоятельно провадити выученый домашный промысл.

По экзамені промовяли Предсідатель О. Т. Р. Нардыз Поточек, секретар Лемко-Союза М. Трохановский, посол Бодзьоны и Ал. Милянч, котры в коротких бесідах высказали потреби села и заохотили собраних до переведеня организации так самого села як и торговлі сельскыма продуктами.

## Оконченє трыкотарского курса в Лабові.

Дня 29. марта отбыло ся оконченє трыкотарского курса в Лабові. Курс окончило 27 курсанток. На оконченє курса приіхал проф. Взорек, управитель О. Т. Р. Климчак, инспектор Издебский и гр. Стадницкий. По выголошеню рефератов забрал голос гр. Стадницкий, котрый заохочал собраних до хову овец и на тоту ціль отступил лабоянам власну поляну, штобы там заложити образцовый кошар. Бесідник звернул увагу также на пасічництво, котре занимает малы пространства землі и дає значны доходы, а также на лісы, с котрыма треба поступати осторожно, бо их єст штораз меньше. Бесідник радит велику осторожность особенно при вырубці дерева и заохочат до залісяня неужитков и жбырков и до удержаня в лісах порядка и рациональной господаркы. При конци отспівано через місцевый хор ряд народных пісней, при котрых мило перешол час.

## Украинска правда.

О ПОДІЯХ В ПАНТНІ ГОРЛИЦКОГО ПОВІТА И О ДОПИСИ „НАШОГО ЛЕМКА“.

В газеті „Лемко“ вспомнули мы раз о том, як украинскы хулиганы села Пантны ходили с колядом на „Рідну Школу“ до членов читальні им. Качковского, як насмівали ся с тых рускых господарей, до котрых приходили, як погодивше напали и побии тоту часть молодежи, котра не пристала до их банды и як проводыра той банды Асафата Гривну замкнул суд горлицкий до ареста, штобы єго усмирити, а спокойным людям в селі уможливити спокойне житє.

Мимо того всього в четвертом номері украинского „Нашого Лемка“ с 15 лютого 1936 указала ся допись под заглавиєм „Робота вихованків криничанських вожак“,

в котрой сказано, што „свідомі“ хлопцы села Пантны колядовали спокойно на ціль церкви, што напал на них вихованок „криничанських нанів“ Васыль Перун, а пак коло хаты Петра Молчана напала на них юрба паробков с читальні Качковского, хотіла выдерти „свідомим“ хлопцам касу, а коли тоте не удало ся, то стали проклинати и лаяти украинцов.

При той случайности автор дописи с ядом встеклой собаки нашмарил ся на „Лемка“ и на „криничанських панів“ и „писак“ а пак с диявольским фалшом нарикат на незгору и на роздор.

Мы не отвічали на тоту допись, бо не належит до приятности перечити ся со свідомыма лгунами, и мы ждали, штобы ціла пантнянска история выяснила ся перед державным судом.

И мы дождали ся, длятого тепер залганому дописователю „Нашого Лемка“ незалежно от того, ци он в реверенді, сурдуті, ци в сердаку и всім „свідомим“ лгунам пантнянским и доокрестным, а в первой мірі тому, котрый давал „припоручення“ пантнянским свідомым розбышкам, доносиме што :

1) выроком суда городского в Горлицах гершт „свідомих“ Асафат Гривна с Пантны был приговореный на кару вязницы через 3. місяцы за небезпечны грозыбы длятого, што грозил смертию всім тым, котры не пристанут до Украины, 2) выроком суда в Горлицах были сасуджены Антон Гривна, отец Асафата, Васыль Лепак и Петро Базарник на арест по одному и два тыждні за того, што побии на публичной дорозі члена читальні им. Качковского хлопца Яцка Цьока, 3) дальше, што Асафат Гривна и Стефан Лепак запозваны до суда за побытє Николая Молчана, сына Петра погодили ся с побытым, принимаючи ся запластити єму судовы кошты и отшкодованє, штобы лем уникнути свіжой кары ареста, 4) кромі того єст ище в току росправа карна против Асафата Гривны о побытє Васыля Перуна.

Так в світлі выроков державного суда выгядаєт коляда „Свідомих“, котрым поручил колядовати парох о. Шуфлят.

Ци не мате отченьку ище „свідоміших“, котры заколядовали бы по пару літ криминала? Не дай Бог, але и до того дойдете.

Не-свідомый.

## Рідкий ювілей.

В неділю 19 квітня отпраздновала львовска Ставропигия торжественно свой рідкий ювілей 350—літє одержаня патрияршой грамоты. Грамота тота надала братству при церкви Успения св. Богородицы во Львові (т. зв. Савропигийскому братству) специальны права, призываючи го одночасно до обороны руской віры и иародности не лем во Львові, але и на цікой полуднево-западной Руси.

Протягом долговікового своєго существованя Ставропигия по днешный день отгrywала и отгrywат перворядну ролю в религиозно-церковном, культурном и национальном житю руского народа.

Ювілейны торжества складали ся с архиерейского Богослуженя в своєй церкви, с общего собраня членов-братчоков, академии и концерта, а вконци с общей трапезы. Академию и концерт возвеличили своєм

присутностью рим. кат. львовский архиепископ Ексц. Твардорский, представителі властей, міста, университета и тд., не было лем гр. кат. владык со львова, а єст их там трох. Хџ правда оден отправил богослуженє. Также не было украинцов; всього пришло трох, може чотырох, помимо того, што „Діло“ написало, же Ставропигийске братство отограло величезну ролю в истории (а пцих! — прим. складача) Украины.

## НА РУСКУ БУРСУ В ГОРЛИЦАХ. пожертвовали в дальшом тягу:

1) с. Ставиша, горл. пов. посредством о К. Короля — 17.50 зл. Збором заняли сь Кирил Ковальчик и Василь Бочньович. 2) с. Петруша Воля, пов. Кросно, посредством читальні им. Качковского — 7 зл. Збором заняли ся Иван Оленяк, Александер Лоняк и Константин Бік. 3) Рус. Благотворит. Общество в Брестю — 10 зл. 4) Рус. Благотвор. Общество в Сарнах — 5.30 зл. 5) с. Лосє, горл. пов.: Г. Евусяк 1.2 сьга дров и Иван Палюх 1.2 сьга дров.

Кромі того интеллигенция горлицко и по части других повітов складат стало свои місячны жертвованя.

Почуваме ся до милого обовязку зложити сердечну признательность и глибоку благодарность вшиткым жертвователям.

Просиме также тоты села, в котрых собрано провянты (головно картофлі) для Бурсы, як найскорше их доставити до Горлиц.

Заряд Руской Бурсы  
в Горлицах.

## С. МИЛИК, ПОВ. НОВЫЙ-САНЧ.

В неділю 22. марта отбыло ся у нас обще собранє чит- им. М. Качковского, при участии понад 150 люда. По отвореню Собраня выбрано президию в особах: г. Алексия Милянча — войта с Поворожняка яко председателя, г. Гараса Громосьяка с Крыницы заступн., г. Васка Барновского со Щавника яко секрет. До нового виділа чит. были выбраны: Предсідателем — г. Стефан Шелестак—солтыс, заст. председателя — г. Семан Жегестовский, секретарем — прав. свящ. о. Михаил Божерянов, касиєром — г. Иоан Хомяк, библиотекарем — г. Мих. Медведик, Заступниками до виділа: гг. Иоан Пирог и Стеф. Пивторак. До Контр. Комисии греко-кат. парох о. Иоан Бугера, г. Иоан Шелестак и г. Андрей Жегестовский.

Потом забрал голос делегат Центрального О-ва им. М. Качковского, ревизор г. Осип Яновицкий и привітствующи от Центра многочисленно собраних селян и гостей, выголосил бесіду о значеню читальні в жизни нашего народа, призываючи селян до єдности, а также поучаючи, як повинна провадити ся чит. работа.

Мгр. г-жа Емилия Яновицка выголосила до селян прекрасный долший реферат на историчну тему, доказуючи историчныма фактами с жерелами: польскыма, німецкыма и рускыма, руске имя и назву нашего народа, котра то назва теперашныма лжеисторыками и просто брехунами в виді наших галицкых украинофилов, як також ихныма опекунами: австрияками и німцами была змінена на „украину“. Воспоминаючи часы наших князей: Олега, Святослава, Владиміра Святого, Мстислава Удалого, Даниила



и Романа Галицких, доказала историчными цитатами руске, а не „якеси украинске“ походженє нашого народа. Нагадуючи всім чотири девизи Просвітеля нашого народа пок. о. Йоана Наумовича, предлагала селянам слідовати тым девизам в своєм житю, ровночасно указуючи, што девиз „моли ся“ и головно церков, спасли наш народ от всіх бід и напастей. Народ руский, котрый 600 літ перебыл руским, перенес Талергофске пекло, перенесе также и теперешну „украинофильску заразу“, познаючи ся своим хлопским розумом на правді историчной, а не фальшованой. Прелегентка в горячих словах звернула ся до русской женщины, указуючи им на важность вихованя своих дітей на русских людей и добрых граждан державы. Дальше доказуючи пользу именно читальни им. М. Качковского для нашего народа, фактами доказала, як наши люды в читальні, читаючи полезны книжечкы выдання Качковского научили ся провадити правильно садоводство, пасіку и т. п. — пожелала успіхов читальні в Милику. Громкы рукоплесканя были нагородом за реферат прелегенткы.

Ревизор г. Яновицкий пояснил присутным потребу основаня по наших селах Кружков Р. Рольн. Союза.

Г. Евстахий Милинич со Щавника, указуючи на понесены нашим народом жертвы в Талергофі, призывал твердо держати ся свого русского имени и памятати, што мы рускы люды.

Слідуючий оратор г. Мих. Жегестовский доказал, што найвеце нам руским лемкам бракує єдности, бракує нам своих русских учителей.

На оконченє забрал голос г. Иоан Пирог, дякуючи всім многочисленно прибившим, а особенно г. Алексию Милиничу г-дам Яновицким и всім чужим гостям и предложил отспівати Многая Літа, што присутны выконали. Собранє окончило ся о год. 6. веч. Присутный.

## Побор рекрута в 1936 р.

В повіті новосандецком отбуде ся головный побор рекрута в часі от 2. мая до 6. червня 1936.

До побору маю явити ся всі, котры родили ся в р. 1915, 1914 и 1913.

Комисия поборова буде урядовати:

а) в Мушині в Дому Здревом в часі от 2-го мая до 8-го мая включно.

б) в Старом Санчі в будынку „Сокола“ от дня 9-го мая до 16-го мая включно.

в) в Новом Санчі в Читальні Міщанской ул. Ягайлонска 37. от дня 18-го мая до 6-го червня т. р. включно.

Обовязком переложеных міст, громад и сел єст допильновати, штобы обовязаны до побора с даных міст, громад и сел явили ся до побора в назначеном часі. В той цілі начальства міст, громад и сел мают познакомити ся точно с пляном побора, штобы могли точно примінити ся до терминного представленя поборовой Комисии мужчин своєї місцевости.

При поборі даной громады мусит быти войт, а в выключных случаях, єсли зайде поважна перешкода, єго заступник. Крім того при поборі даного села мусит быти солтыс. Обовязаны до побора мают явити ся разом с войтом точно о год. 7:30 рано.

Запозданє в явленю ся до побора єст недопильноване и буде строго каране. Солтыс (войт) и делегованы до побора президентом міста Нового Санча и бурмистров урядники мают потвердити перед Комисием идентичность особы и допильновати, штобы поборова в часі побора заховали ся прилично. Поборова с громад городских повинни мати при собі „dowody tożsamości“ або фотографии с потверженєм идентичности через Заряд Городский. Поборова катег. „Б“ являючи ся поновно перед Комисием должны предложити войсковы за свідченя (барвы зеленой), котры достали от Комисии в попередном року. Пожадане єст повідомити поборова о терміні побора посредством врученя им личных возвань. Поборова, жиючих поза границами міста, або села, треба начас повідомити о терміні побора.

Поборова должны явити ся перед Комисием в стані трезвом, чисто одіты и умыты. Поборова, котры перекрочат тот припис, будут укараны. Также до ответственности потягне ся солтыса того села за недопильнованє того припису. В часі войкового побору так в помещеню Поб. Комисии, як и поза помещенєм мают поборова заховати ся прилично. Всякы заколоты публичного порядка на дорогах сут недопильнованы и будут остро караны. На войтов и солтысов накладывают ся обовязок поучити поборова о том зарядженю.

Кошты явленя ся поборова перед поборовою Комисиею покрывают поборова с власных фондов. Кошты бідных поборова покрыват Заряд Громады. Поборова с дальших місцевостей должны войты дати фурманкы в цілі улегченя явны перед поб. Комисием.

Поборова мают явити ся перед поб. Комисием со школьными свідочтвами с послідной клясы, а солтысы мают предложити Комисии выказ потверджаючий килько кляс окончили поодынокы поборова.

### Заказ продажи опиртных напитков в часі побора.

На основі арт. 4. пукт. 7. закона с 21.III. 1931. (Дн. З. Р. П. Нр 51 поз. 425) заказує ся продажи и подаваня спиртных напитков в часі головного побора.

Заказ тот относит ся до тых сел, с котрых поборова стают до побора попередный день и в день побора, а также міста Новый Санч, Старый Санч и Мушину через цілый час урядованя поб. Комисии, каждого дня от год. 5-той до 15-той.

О заказі треба повідомити всіх властителей концесий и шинкарских помещень находячих ся на терені побора. Выполненя того припису допильнуют войты, солтысы и постерункы Полиции Держ. в повіті.

Президента міста, бурмистрв, войтов и солтысов просит ся лично допильновати, штобы всі приписы того зарядженя были точно выполнены.

## П Л Я Н

### Головного Побора войкового в пов. ново-сандецком в р. 1936.

В Мушині: Дом Здревый, в часі от 2-го мая до 8-го мая 1936.

2.V. 1936 година 7:30

Місто Мушина,

Громада Мушина — села: Андреевка, Дубне, Ястрибик, Лелюхов, Милик, Поворозник.

4.V. 1936 год. 7:30

Громада Мушина — села: Щавник, Войкова, Злоцке, Жегестов.

Громада Крыница-Село: Крыница-Село, Солотвины.

5.V. 1936 год. 7:30

Громада Тылич — села: Берест, Чирна, Мохначка Нижна, Мохначка Выжна, Мушинка, Перунка, Поляны, Тылич.

6.V. 1936 год. 7:30

Громада Лабова — села: Камянна, Крижовка, Новавесь, Лосє, Росток Велика, Угрын

Громада Пивнична — села: Ломница, Верхомля Мала, Верхомля Велика, Зубрик.

7.V. 1936 год. 7:30

Місто Пивнична

8.V. 1936 год. 7:30

Місто Крыница Здрой.

В Старом Санчі: будынок „Сокола“ от 9-го мая до 16-го мая 1936.

вызначений єст головный побор для польских сел, котрых не выказуєме подробно.

В Новом Санчі: в будынку Читальні Міщанской ул. Ягайлонска Ягайлонска 37. от 18-го мая до 6-го червня 1936.

18.V. 1936 год. 7:30.

Громада Лабова—села: Котов, Лабова, Лабовец,

Громада Навоєва—села: Барновец, Бонча Кунина, Чачов, Фрыцова, Гомрича, Лазы Бєголицкы, Матієва, Мыслец, Поремба Мала, Росток Мала, Складисте, Злотне, Железничкова.

Дня 19, 20, 22, 23, 25, 26, 27 и 28 мая отбуде ся побор лем самых польских сел.

29.V. 1936 год. 7:30.

Місто Грибов

Громада Грибов—села: Біла Нижна, Біла Выжна, Білцарева, Богуша, Хедорова.

30.V. 1936 год. 7:30.

Громада Грибов — села: Цєнява, Флорынка, Концльова, Королева Руск, Кружлева Нижна, Кружлева Выжна.

2.VI. 1936 год. 7:30.

Громада Грибов — села: Мшальница, Сьолкова, Пташкова, Стара Вєсь, Вафка.

Дня 3, 4, 5 и 6-го червня

Місто Новый Санч.

ПОМІЩАЙТЕ  
ОГОЛОШЕННЯ  
В ГАЗЕТІ „ЛЕМКО“



## Што чути в світі.

**Страшна буря в Амерыці.** Над полудневими державами Півночної Амерыки перешла страшна вітерница (торнадо), котра вырядила величезны шкоды, особливо в місті Гаинсбильде, где знищила цілковито промыслову дільницю, чотыры школы и 750 домов. Около 500 людей утратило житє. Катастрофа спричинила численны пожары.

**Парыж:** Оден французский лікар вынашол теч, котра выляна на хусточку до носа в количестві килькох капель, дійствує яко средство против туючим газам. Хустка така може заступити противгазну маску. Дійствие тых капель треват 48 годин.

**Рим:** С фронту абисинского доносят, же италияны заняли міста Гаррар и Джиджигга.

**Відень:** Негус намірят перенести столицу державы до западной Абисинии с увагы на возможность опанованя италиянскыма войсками Аддис-Абебы. Означат того, же война буде ведена дальше аж и по опанованю столицы.

**Рим:** Англия замкнула границу Судану от Абисинии и италиянской Ерытреи. На границу Абисинии в Судані высылат ся великы воєнны транспорты.

С Аддис-Абебы доносят, же на полноч от того міста идут завзяты бои. Вокруг заграничных посольств повстали великы обозы. Поміщено там кухні для глядаючих охороны граждан чужих держав.

**Льондын:** Англицка преса додосит о вооруженю Совітов на манджурской границі. Вздолж границы от озера Байкальского аж до Владивостока на пространстві 2,500 км. побудовано величезны укріпленя. Оборонна стрефа має великы количества воєнного материяла и змобилизованных отділов. Днями и ночами иде работа над будовом стратегичных желізнодорожных штрек и автомобильных дорог. В минувшом тыждні отдано до употребленя армии дорогу долготы 800 км. ведучу от Владивостока до Хабаровска. Дорога тотя єст достыженєм высокой техники, бо иде она через багна, для осушеня котрых треба было перевезти 10 миллионов кубичных метров землі. Безчисленны фабрыкы консерв приготавлиют консервы для потреб армии. Цілый промысл и рольництво находят ся под непосредным руководством генерала Блихера.

**Москва:** Знаний ученый світский и популярный подорожник професор Самойлович представил правительству плян будовы подморского тунеля под проливом Беринга, лучачого Сыбир с Аляском. Тунель такой мал бы 75 км. долготы. Кошт будовы обчисляют на 500 молионов долларов.

В Палестыні выбухли противожидовскы розрухы. В часі похорона 2-ох арабов убитых в Яффі, арабы шмарили ся на skleпы и дома жидовскы и устроили погром жидов. Убито 19 жидов а 135 єст раненых. Медже арабами єст 2 убитых и килькох раненых. Также в Тель-Авив дошло до розрухов медже жидами и арабами. В шпиталю Тель-Авив находит ся 50 жидов ра-

нених. Арабы оголосили генеральный штрайк в цілой Палестыні. В часі розрухов в Тель-Авив арабы подпалили жидовскы дома, котрых спалило ся понад 100.

**Мадрыт:** Як доносят газеты в Испани має быти оголошена дыктатура пролетарията. На засіданю правленя социялистичной партии нараджано ся над пляном знесеня приватной власности и удержавленя всіх підприємств.

В полудневой Німеччині упали в минувшом тыждні величезны снігы, котры в гдекотрых місцах доходят до 1, м. а в горах аж и до 3 метров высоты. Сніг тот вырядил величезны шкоды.

**Парыж:** Французскы жерела подають, же до надренской стрефы Німеччина выслала 70 тысяч работников для будовы укріпленя. Твердыні німецкы має ся будовати на образ славной французской „Linji Maginotta”. На тоту ціль ухвалено кредит в высоті 100 миллионов марок.

## Вісти с краю.

**Варшава:** Министерство Финансов комуникує офіцияльно: В звязи с поширяныма в послідных часах поголосками о мнимой зміні валютной политыкы через девалуацію злотого, правительство категорычно заявлят, же поголоскы тоты сут позбавлены всяких основ и сут шкодливы для державы.

**Варшава:** Дня 21 квітня отбыла ся на замку в присутности Г-на Президента Р. П. премизра Мосцялковского, председателя Польского Банка Коца, генерала Рыдза-Смиглого, председателя П. К. О. Грубера и министров Квятковского, Рачкевича, Понятовского и Ульрыха — нарада над теперешным господарчим положенєм в звязи с потребами державы.

**Варшава:** На предложене Рады Министров Г-н Президент Р. П. освободил с должности воєводу краковского Свیتالського.

Новым воєводом краковским заименовано дня 21.IV. полковника Михаила Гноинского дотеперешного коменданта артилерийской

школы в Торуню. Теперешный воєвода уродил ся во Львові в р. 1886. По окончению гимназии был студентом львовской политехники, котрой не окончил с причины выбуху войны. В часі войны служил при II. бригаді Легионов. По войні трудил ся в войсковой администрации. В р. 1929. именовано его комендантом Школы Прап. артилерии в Торуню, где трудил ся аж до тепер.

Новоименованный воєвода приіхал до Кракова 22 квітня, где по повитаню его через представителей краковских властей с вицевоєводом г-ном Малашинским во главе, обнял урядованє.

В Познаню дня 21. квітня безработны урядили демонстрацию перед домом Фонда Труда, а пак старали ся передостати перед дом воєводства. Наміренє того ударемнила полиция, котра росогнала демонстрантов.

**Львов:** В звязи с розрухами во Львові власти арестовали около 1500 люда, котрых розміщено во львовских и доокрестных вязницах. С того числа 70 людей вывезено до Картуз. Березы.

Дня 19.IV. о год 9-ой рано отбыл ся похорон жертв львовских розрухов. На яновске кладбище перевезено тягарныма автомобилями 10 домовин. Похорон отбыл ся тихо. В цілом місті заряджено острый надзор полиции. Вечером кружили по улицах міста танкы с машинныма карабинами.

День 12 мая, яко рочница смерти Марш. Пилсудского буде свободный от науки в школах народных и середных. В цілом краю має отслужити ся богослуженя для школьной молодежи.

Дня 1. мая буде обовязовати заказ продажи спиртных напитков.

Через Варшаву перевезено с Амерыкы до совітов будовельны машины вартости миллиона злотых. Машины тоты будут ужиты при будові величезного будынку, який хотят Совіты побудовати на Красной Площі в Москві. Будынок тот буде ся звати „Дворец Совітов” и має быти найбільшим будынком на світі.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ  
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,  
НЕХАЙ ЯКНАЙСКОРШЕ

заасекурує ся  
в асекураційном Товаристві  
ВИТА И КРАКОВСКЕ  
во ЛЬВОВІ

Асекурацію принимают на цілой Лемковщині  
представителі: гг. Осиф Яновицкий — Крыница-Село и Михаил Перелом — Сянок.